

Josef Motzfeldtip Dronningimut Ministeriunermullu qujassuteqarluni oqaasii

Oqaaserineqartut atuupput.

Namminersorneq pillugu inatsisip tunniunneqarneranut inuiaat kalaallit, Inatsisartut Naalakkersuisullu sinnerlugit Ataqqinartorsuaq qutsavigaara. Persuarsionartumik tunniussineq inuiaat kalaallit oqaluttuarisaanerminni pingaarutilittut eqqaamajuassavaat. Aammattaaq ullormi namminersulerfitsinni danskit naalakkersuisui sinnerlugit Statsminister Lars Løkke Rasmussenip oqaaserisai nuannersut qimmaallannartullu qujassutigaakka.

Nuannaarutigaara ataqatigiinnitsinnut Namminersornermut inatsiseqalerneq oqaluttuarisaanerlu kisimik aallaaviunatik aammali Naalagaaffeqatigiinnermi ilaasortat ataatsimoorlutik ilumoorussillutillu nammaqatigiikkumanerat aallaaviummat. Statsminister Lars Løkke Rasmussenip oqalugiarnermi Namminersornermut atatillugu ataqatigiinneq tamanna pitsaanerpaamik tunngavilerpaa.

Inatsisartut Kalaallillu Nunaat sinnerlugit tunissut una kusanaqisoq qujassutigaara - tunissut ullormut matumunnga nuanningaartumut oqaluttuarisaanitsinnilu pingaaruteqaqisumut siunissami eqqaasitsissutaasarumaarpoq.

Pingaartinneqarlunilu kusagineqartarumaarpoq. Qinikkaniinnaanngitsoq aammali Inatsisartunut takuniaasorpassuarnit. Tamat oqartussaaqataanerannik ingerlatsinitta oqaluttuassartaata ilaatut isigineqarumaarpoq ullullu matuma eqqaamaneqaataasa ilagiumaarlugu.

Aammali Inatsisartut Folketingillu akornanni ataqatigiinnermut takussutissaasutut isigaara. Tassaavoq tamat oqartussaaqataanerannik ingerlatsisumit uagutsinnut tamat oqartussaaqataanerannik ingerlatsisunut ullumilu oqaluttuarisaanitsinni ullunut nutaanut isernitsinni malunnartitsisunut tunissut.

Inatsisartut ataatsimiittarfianniinnerup NAGGASERNEQARNERA

Ullormut matumani pingaaruteqaqisumi Inatsisartut ataatsimiittarfianni tamassi peqataanissinnut qujanaq naggataatigullu Inatsisartunut eqqaasitsissutigissavara Inatsisartut isaariaanni tummeqqani pisortatigoortumik assilisittoqassamat tamassilu qinnuigaassi kingusinnerpaamik nal. 11.15 assilisinnissamut piareeqqullusi. Ullorsiorluarnissassinnik tamassi kissaappassi.